

† Maria Cavegn, Rueras

(Corr.) Il Signur sur veta e mort ha clamau ils 3 da settember 1980 sia survienta, Maria Cavegn, egl asil da s. Vigeli a Sedrun, tier el. Ella ei morta ella vegliadetgna da bunamein 84 onns. La defuncta ei naschida ils 21 da settember 1896 a Rueras /Tujetsch. Ella fuva la secunda veglia da 5 fargliuns dils buns geniturs Giachen Fidel e Maria Cavegn, nata Jocomet. Igl ei stau in bien onn. En tut ei vegniu registrau 16 naschientschas: 4 buobs e 12 buobas, e quei bein capiu mo a Rueras. En ina casa d'oraziun, lavur e tema da Diu ei Maria carschida si ensemens cun ses fargliuns. Ei ha giu num a temps pegliar en la lavur. Ella ha frequentau las scolas primaras e la secundara senza difficultads. Il Segner veva dau ad ella fetg buns duns. Fuss ei buca stau onns aschi maghers, havess ella segir saviu ir vinavon a scola. Mo ei veva num da giez temps mirar co vegnir atras cun quei tec dil pur.

La defuncta ei stada persula. Ensemens cun siu frar han ei luvrau – suen-



ter la maridaglia da lur fargliuns – ils funs, partend tut sco vers fargliuns. Essend la Maria ina femna da gronda statura, temeva ella nuota da semetter en canbau cun ils umens. La Maria ei stada naven zatgei, a Glion ed a Trun. Leu ha ella giu caschun d'emprender da cuser, quei ch'ei stau fetg d'engrau, returnond a casa. Ella mava denteren a cuser tier las famiglias, sco ei era lu moda d'ir sin in pign gudogn. Il pli grond tschaffen veva ella da siu taler. Contas bellezias caussas ch'ella ha tessiu sin quel. Me-mia baul ha ella piars la mumma ed ha stuiu remplazzar quella schi bein sco pusseivel.

Ils onns vargan. La Maria sto sedecider dad ir egl asil da s. Vigeli a Sedrun. Quei ei succediu il zercladur 1977. E cheu han ei fatg bien cun ella. Ei seigi engraziau allas bunas soras persuenter. Ils davos onns ha la via dalla crusch era suatiu la buna Maria. Mo ella ha purtau tut en resignaziun exemplarica. Ils 6 da settember han ins surdau ella alla tiara benedida. Numerus han dau il davos comiau ad ella. Ad ella – sco a nos cars de-juncts – sclareschi la glisch perpetna. Ils restai anavos – en special il frar Luis – vegli il Segner consolar! G.F.